



Elin Jones AS
Llywydd
Senedd Cymru
Bae Caerdydd
Caerdydd
CF99 1SN
Llywydd@senedd.cymru

25 Gorffennaf 2023

Annwyl Elin

Ysgrifennais i atoch chi ar 29 Mehefin 2023 am y Bil Ynni ('y Bil') a gyflwynwyd gerbron Tŷ'r Arglwyddi Senedd y DU ar 6 Gorffennaf 2022. Cafodd taith y Bil ei hatal am gyfnod, cyn iddo ailgychwyn ddiwedd 2022, a disgwyliar i nifer o welliannau eto gael eu cyflwyno yn ystod camau olaf taith y Bil drwy Senedd y DU.

Yn dilyn y llythyr hwnnw a'r Cynnig Cydsyniad Deddfwriaethol, rwy'n ysgrifennu nawr am Gynnig Cydsyniad Deddfwriaethol atodol (sLCM) am y cymalau sy'n ymdrin â'r Pecyn Gwelliannau Amgylcheddol Gwynt Alltraeth (OWEIP) yn y Bil. Roedd chwe chymal OWEIP ym Mhennod 1 o Ran 13 y Bil, sef Cymalau 286-291. Cafodd y cymalau eu gosod fel gwelliannau i'r Bil yn Nhŷ'r Arglwyddi ar 9 Ionawr 2023 a chafodd rhagor o welliannau i'r Bil eu gosod gan Lywodraeth y DU ar 7 Mehefin 2023.

Amcan Llywodraeth y DU o ran cymalau OWEIP yw cyflymu datblygiadau gwynt ar y môr trwy:

- Alluogi mesurau digolledu strategol i ddatflocio'r rhwystrau ar gyfer cydsynio cynlluniau gwynt ar y môr a fydd yn cael effaith andwyol ar safleoedd a warchodir gan Ewrop;
- Caniatáu sefydlu Cronfa neu Gronfeydd Adfer y Môr i hwyluso'r mesurau hynny, a
- Caniatáu newid y drefn asesu amgylcheddol o dan Asesiad y Rheoliad Cynefinoedd (HRA) a threfn asesu parthau cadwraeth morol (MCVZ) sy'n berthnasol i gydsynio a thrwyddedu cynlluniau a phrosiectau gwynt y môr er mwyn hwyluso'r newidiadau hynny.

Cewch ragor o fanylion y ddeddfwriaeth berthnasol yng Nghymru yn yr sLCM am gyd-destun.

Canolfan Cyswllt Cyntaf / First Point of Contact Centre:
0300 0604400

Bae Caerdydd • Cardiff Bay
Caerdydd • Cardiff
CF99 1SN

Gohebiaeth.Julie.James@llyw.cymru
Correspondence.Julie.James@gov.Wales

Rydym yn croesawu derbyn gohebiaeth yn Gymraeg. Byddwn yn ateb gohebiaeth a dderbynnir yn Gymraeg yn Gymraeg ac ni fydd gohebu yn Gymraeg yn arwain at oedi.

We welcome receiving correspondence in Welsh. Any correspondence received in Welsh will be answered in Welsh and corresponding in Welsh will not lead to a delay in responding.

Mae Llywodraeth y DU yn credu bod gwelliannau OWEIP yn ymwneud â mater a gedwir yn ôl ac felly y tu allan i gymhwysedd deddfwriaethol Senedd Cymru. Maen nhw'n dadlau mai prif bwrpas gwelliannau OWEIP yw cyflymu datblygiad prosiectau gwynt ar y môr er mwyn cynyddu cynhyrchiant y DU o ynni gwynt y môr, sy'n ymwneud â'r mater a gedwir yn ôl "Cynhyrchu, trawsyrru a chyflenwi trydan".

Barn Llywodraeth Cymru yw bod gwelliannau OWEIP yn gwneud darpariaeth ar gyfer Cymru am bwrpas sydd o fewn cymhwysedd Senedd Cymru o ran diogelu'r amgylchedd, trwyddedau morol a chynllunio ar gyfer gorsafoedd cynhyrchu syn llai na 350MW, i'r graddau bod gwelliannau OWEIP yn ymwneud â rhanbarth glannau Cymru.

Rwyf wedi ysgrifennu at Lywodraeth y DU sawl gwaith bellach i leisio pryderon nad yw cymalau OWEIP, fel y maent wedi'u drafftio, yn parchu cymhwysedd deddfwriaethol Senedd Cymru, na chyfrifoldebau datganoledig Gweinidogion Cymru, Mae Llywodraeth Cymru yn argymhell gwrthod rhoi cydsyniad ar gyfer cymalau OWEIP ar yr adeg hon, a gosodais y Memorandwm Cydsyniad Deddfwriaethol atodol ar 25 Gorffennaf 2023.

Fel gyda'r LCM, rwy'n sylweddoli bod y dyddiad cau arferol o bythefnos ar gyfer gosod Memorandwm Cydsyniad Deddfwriaethol atodol o dan Reol Sefydlog 29 wedi hen fynd heibio. Bu hyn yn rhannol oherwydd y ffordd mae Llywodraeth y DU wedi ymdrin â'r Bil, ond hefyd oherwydd cymhlethdod y materion sy'n cael eu hystyried. Rydym yn disgwyl i Lywodraeth y DU wneud rhagor o newidiadau i'r Bil ac i'r cymalau wrth i Dŷ'r Cyffredin barhau i'w ystyried. O gofio pwysigrwydd mesurau OWEIP i'n gallu i reoli amgylchedd y môr ac o gofio nad ydym yn teimlo bod Llywodraeth y DU yn parchu'r setliad datganoli, rwy'n awyddus i'r LCM hwn ganolbwyntio ar y cymalau a gyflwynwyd gan Lywodraeth y DU fel gwelliannau. Bydd angen Memorandwm Cydsyniad Deddfwriaethol atodol arall i ymdrin â'r gwelliannau eraill i'r Bil a fydd yn cael eu gosod cyn gynted ag y bo modd. Disgwylir i'r Bil symud drwy gamau olaf Senedd y DU ym mis Medi.

Rwy'n anfon copi o'r llythyr hwn at y Cwnsler Cyffredinol a Gweinidog y Cyfansoddiad, Mick Antoniw AS, y Gweinidog Materion Gwledig a Gogledd Cymru, a'r Trefnydd, Lesley Griffiths AS, a Chadeirydd y Pwyllgor Deddfwriaeth, Cyfiawnder a'r Cyfansoddiad, Huw Irranca-Davies AS.

Yn gywir



Julie James AS

Y Gweinidog Newid Hinsawdd
Minister for Climate Change